

Morning Regional Dogri News Bulletin

मार्निंग डोगरी न्यूज बुलेटिन,

<><><><><><><><><><><><>

**Headlines**

1. केन्द्री मंत्री डाक्टर जीतेन्द्र सिंह हुंदे आसेआ कीती गेदी फौरी मदाद दे राहें जम्मू-कश्मीर थमां इक साबका फौजी गी ओहदी दिव्यांगता पेंशन दे बकाये तुरत हासल होए न।
2. केन्द्री कपड़ा सचिव नीलम शम्मी राव होरें दस्ती कलीन दी बुनाई आहली अनोखी कला गी बढ़ावा देने ते एहदे च नमें सिरेया जान भरने दी सरकार दी वचनबद्धता गी फही पक्का कीता ऐ।
3. जंगलात मंत्री जावेद राणा होरें जनजातीय इलाकें च योजनाबद्ध ते टिकाउ विकास दी जरूरतें पर जोर पाया ऐ।
4. मुख्ख सचिव अटल डुल्लु होरें जम्मू-कश्मीर च सेहत सरबन्धी बड्डे ढांचागत प्रोजेक्टें दा जायजा लैंदे होई इंदे कम्में च तेजी आहने ते इनेंगी पूरी चाल्ली चालू बनाने दी जरूरतें पर जोर पाया ऐ।
5. डोडा जिले च विधायक मेहराज मलिक दी गिरफ्तारी दे बाद तनोतनी आहला म्हौल बने दा ऐ। कल होई दिएं हिंसक झडप्फें च पुलसकर्मी ते प्रदर्शनकारी जख्मीं। प्रशासन नै एहतियात दे तौर पर इंटरनेट सेवाएं गी मुअत्तल करदे होई बंदिशें आहले हुक्म लागू करी दिते न।

हून खबरें दी तफसील कन्नै विजय बजाज:-

<><><><><><><><><><><><>

**Jitendra- Pension**

केन्द्री मंत्री डाक्टर जीतेन्द्र सिंह होरें कल नमीं दिल्ली च 14मीं कुल भारती पेंशन अदालत दी प्रधानता करदे होई पेंशनरें दिएं समस्याएं गी सुनेआ। जम्मू-कश्मीर थमां इक पेंशनर लेफ्टिनेंट (सेवानिवृत्त) बलबीर सिंह हुंदे कन्नै गल्ल करदे होई मंत्री होरेंगी एह पता लगगा जे उंदी दिव्यांगता सरबन्धी पेंशन दे बकाये, जारी नेई कीते गेदे न। इस पर तुरत कार्रवाई करदे होई मंत्री होरें लाभार्थी दे पक्ख च 46 लक्ख 4 ज्हार रपे दे एरियर तुरत जारी करोआना जकीनी बनाया। इस मौके पर पेंशनर बलबीर सिंह हुंदे कन्नै गल्ल करदे होई मंत्री होरें आक्खेआ

मगरा सोशल मीडिया पर इक पोस्ट च डाक्टर जीतेन्द्र सिंह होरें आक्खेआ जे प्रधानमंत्री नरेन्द्र मोदी हुंदी अगुवाई आहला एह इक नमां भारत ऐ जेहदे च सेवाएं च चिर नेई, सगुआं तुरत दस्तयाबी जकीनी बनाई जंदी ऐ।



### **Union Textiles Secy**

केन्द्री कपड़ा सचिव नीलम शम्मी राव होंरें दस्ती कलीन दी बुनाई आहली अनोखी कला गी बढ़ावा देने ते एहदे च नमें सिरेया जान भरने दी सरकार दी वचनबद्धता गी फही पक्का कीता ऐ। सचिव होंरें एह गल्ल कल श्रीनगर च कलीन बनाने सरबन्धी तकनीकें आहले इंडियन इंस्टीच्यूट ऑफ कारपेट टेक्नोलॉजी कैंपस दे संगठित उन्न विकास प्रोग्राम तैहत कारीगरें गी फौलाद कन्नै नमें सिरेया तैयार कलीन बनाने आहली खड्डियां बंडडे होई आक्खी। इस मौके पर अपने संबोधन च केन्द्री सचिव होंरें जम्मू-कश्मीर सरकार गी आक्खेआ जे ओह जांच ते प्रमाणन सुविधाएं दा दर्जा बधाने लेई केन्द्री कपड़ा मंत्रालय गी होर ऐसे प्रस्तास भेजन। उनें रिवायती कलाएं च नमें सिरेया जान भरने ते उनेंगी अज्जै-कल्लै दे स्हाबे दा बनाने दी जरूरतें पर जोर पाया तांजे- कश्मीर दे दस्तकारी उत्पादें गी दुनिया भरै दे बक्ख-बक्ख बजारें तोहड़ी मजबूती कन्नै पुजाया जाई सकै।



### **Rana –Tribal Conf**

जनजातीय मामले दे मंत्री जावेद राणा होंरें विकास योजनाएं च सब्भनें दी शमूलियत ते विकेंद्रिकरण दी जरूरतें पर जोर दिंदे होई आक्खेया ऐ जे जनजातीयें गी जमीनी सतह पर सशक्त कीता जाना लोड़चदा। उनें आक्खेया जे सरकार आसेया शुरु कीते गेदे कम्म ते पैहलकदमियां असरदार होन ते उन्दे पर बनकदी साकारात्मक प्रतिक्रिया बी दिक्खने गी लब्भै-एहदे लेई मकामी विधायकें ते जनता दे प्रतिनिधियें दी शमूलियत बी बड़ी जरूरी ऐ। कल अनंतनाग च आयोजित जनजातीय सम्मेलन गी सम्बोधित करदे होई राणा होंरें आक्खेया जे जनजातीय मामले दी तरजीह इनें समुदायें तगर सेहत सुविधां- शिक्षा- डिजिटल सम्पर्क ते ग्रामीण विकास गी यकीनी बनाना ऐ। उनें आक्खेया

जावेद राणा होंरें अनंतनाग दे हाड़ें सवा प्रभावित केंई इलाकें दा दौरा लाइयै- उल्थे हालात दी समीक्षा कीती-जिंदे च पुशवाड़ा-खन्नबल-नाथपोरा- हरनाग- लार्म- वानपो ते कन्नै लग्गदे होर केंई इलाके शामिल न।



### **Udh. EVM Verification (Dispatch)**

उधमपुर दिएं जिला चुनांस अधिकारी सलोनी राय होंरें जिले च चनैनी असेम्बली हलके दिएं ई.वी.एम मशीनें दी जांच ते तसदीक दा कम्म औंदी 18 सितम्बर शा शुरु करने दा फैसला लैता ऐ। एह गैह, साबका मंत्री ते इस हलके थमां मेदवार हर्षदेव सिंह हुंदी गुजारिश पर पुट्टी गेई ऐ। ई.वी.एम मशीनें दी जांच ते तसदीक दा कम्म उधमपुर च जागतें दे डिग्री कॉलेज च बड्डले 10 बजे शा संझां 7 बजे तोहड़ी कीता जाहग। इस बारै पेश ऐ साढ़े उधमपुर संवाददाता दी एह रिपोर्ट



### Udh Dengue (Dispatch)

उधमपुर जिले च डेंगू दे लगातार नमें मामले सामने आवा करदे न। जंदे रोज जिले च 3 नमें मामले सामने औने दे मगरा हून इंदी कुल गिनतरी 28 होई गई ऐ। सेहत मैहकमे मूजब, जंदे रोज सामने आए दे त्रै नमें मामलें चा इक शैहरा दे गैदां तलाब इलाके थमां ते दंऊ मामले आदर्श कलोनी इलाके थमां आए न। एहतियात दे तौर उप्पर सेहत मैहकमे दिआ मलेरिया टीमां लगातार दवाइएं दा छिड़का करदे होई लोकें गी डेंगू शा बचने लेई अपनाए जाने आहले हीलें बारै बी जानकारी देआ करदि'आं न। पेश ऐ साढे उधमपुर संवाददाता दी एह खास रिपोर्ट



### CS -Health Infra

मुख्य सचिव अटल डुल्लु होरें जारी विकास कम्में दी रफतार च तेजी आहन्ने दी जरूरतें पर जोर भरेया ते आक्खेया एह यकीनी बनाना बड़ा जरूरी ऐ जे हत्थै च लैते गेदे कम्म ते परियोजनां तौले शा तौले मुकम्मल होई सकन। जम्मू-कश्मीर च बड्डियें ते प्रमुख्य सेहत ढांचा परियोजनाएं दी स्थिति ते रफतार दी समीक्षा करदे होई अटल डुल्लु होरें नमें बनाए गेदे 7 मैडिकल कालजें बारे व्यापक जानकारी हासल कीती- जेहदे च उन्दियां ईमारतां-होस्टल- प्रशासनिक ब्लाक- रिहाइशी-क्वाटर ते उन्दे नै जुड़े दे अस्पताल परिसरें दी स्थिति दी जानकारी बी शामिल ऐ। एहदे कन्नो-कन्नी मुख्य सचिव होरें पुराने सरकारी मैडिकल कालेज जम्मू ते श्रीनगर दा दर्जा बधाने दे कम्में दी बी समीक्षा कीती।



### CS -DFCO

सार्वजनिक सेहत दे महत्वें पर लोऽ पांदे होई मुख्य सचिव अटल डुल्लु होरें समूलचे जम्मू-कश्मीर च सुरक्षित ते साफ-सुथरी खाद्य आपूर्ति जकीनी बनाने लेई कानून नाफिस करने आहले तंत्र गी तगड़ा बनाने सने असरदार निगरानी ते सख्त नियंत्रण दी जरूरतें पर बी जोर पाया ऐ। डुल्लु होरें एह गल्ल केन्द्र शासित प्रदेश दे बक्ख-बक्ख हिस्सें च पिच्छले दिनें खराब मांस जब्त कीते जाने दी पच्छोकड़ै च दोआइएं ते खाने-पीने दे समेयान पर नियंत्रण रक्खने सरबंधी संगठन दे खाद्य सुरक्षा विंग दे कम्मैकाजें दा जायजा लैने आस्तै सद्दी गेदी इक उच्ची सतह दी जायजा बैठक दी प्रधानता करदे होई आक्खी। उनें खाने-पीने सरबंधी चीजें दा कारोबार करने आहले इदारें च निरीक्षण बधाने ते नियमें दी उल्लंघना करने आहलें खलाफ सख्त कार्रवाई करने दे निर्देश बी जारी कीते।



### Doda Tense

जम्मू-कश्मीर च आम आदमी पार्टी दे इक्कले विधायक मेहराज मलिक गी सार्वजनिक सुरक्षा कानून यानि पी.एस.ए तैहत हिरासता च लैते जाने दे मगरा कल डोडा ते एहदे कन्नै लगदे इलाकें च तनोतनी बनी दी रेई ते प्रदर्शनकारिएं ते सुरक्षाबलें बशकार हिंसक झड़पफां होइयां। आकाशवाणी दे जम्मू संवाददाता दी रिपोर्ट मूजब, जंदे रोज एह प्रदर्शन शुरु होए ते केईं थाहरें पर सुरक्षाबलें आसेआ प्रदर्शनकारिएं गी खिंड-बिंड करने लेईं लाठीचार्ज ते अत्थरूं आहने आहली गैस दा इस्तेमाल बी कीता गेआ। जिले च बंदिशें आहले हुक्म लागू करी दिते गेदे न ते संवेदनशील इलाकें च बादरू सुरक्षाबलें दी तैनाती जकीनी बनाईं गेईं ऐ। कल डोडा कन्नै लगदे भद्रवाह कस्बे च बी झड़पफां होइयां- जिस करी केईं प्रदर्शनकारी ते दंडु अफसरें सने सुरक्षाबलें दे जवान बी जख्मीं होए। एहतियात दे तौरा पर वाई-फाई ते मोबाईल इंटरनेट सेवा गी बंद रक्खेया गेदा ऐ।



### **GST Refors (Byte)**

समूलचे जम्मू-कश्मीर च आम लोकें ते कारोबारिएं बी हाल च सरकार आसेआ माल-समेयान ते सेवाएं सरबंधी टैक्स जी.एस.टी दिएं दरें च कटौती दे ऐलान दा बड़ा मता सोआगत कीता ऐ। अगली पीढी दे एकडे जी.एस.टी सुधारें दे तैहत सरकारें घरें च इस्तेमाल होने आहले इलैक्ट्रॉनिक समेयान गी मता किफायती बनाइयै मझाटले तबके दे लोकें गी बड़ी बड्डी राहत दिती ऐ। एयर कंडिशनरें, डिशवाँशरें ते एल.सी.डी ते एल.ई.डी टेलीविजनें पर जीएसटी दी दर गी 28 फीसद शा घटाइयै 18 फीसद करी दिता गेआ ऐ। इस बारै साढ़े संवाददाता नै इक गृहिणी कन्नै गल्लबात करियै इस फैसले बारै उंदी प्रतिक्रिया हासल कीती



### **Hangul Conf (Byte)**

हंगुल सने विलुप्त होने दी कगार पर पुज्जी गेदे खुर आहले होरनें जनौरें बारै स्कॉस्ट कश्मीर च कल्लै थमां दुए अंतर्राष्ट्री सम्मेलन दा आगाज होआ। त्रंऊ दिनें दे इस सम्मेलन दा मकसद कश्मीर दे मशहूर हंगुल हिरण सने एहदे कन्नै जुड़ी दिएं होरनें प्रजातिएं दे संरक्षण सरबंधी जरूरतें गी उजागर करना ऐ। देसै दे बक्ख-बक्ख हिस्सें सने होरनें मुख्खें जि'आं अमरीका, कनाडा, ब्रिटेन, मध्य पूर्व ते मध्य ते दक्खन एशिया दे मुख्खें थमां बी वन्य जीवें सरबंधी तकरीबन 200 माहिर-विशेषज्ञ इस सम्मेलन च हिस्सा लै करदे न। इस सम्मेलन च शिरकत करै करदे इक डेलीगेट नै मीडिया कन्नै गल्ल करदे होई आक्खेआ

